

# Firads, perdunanzas e processions cun parada

Ils dis da festa religius sco impurtanta part da la pietad populara

■ **Entaifer il catolicissem èn sa svilupadas numerusas furmas da pietad populara, surtut en connex cun la veneraziun da Maria, dals anghels e dals sontgs. Quellas vegnivan per part pratigadas a moda individuala u en il ravugl famigliar; da l'otra vart ha la pietad populara er dà il colorit local a las numerusas festas ecclesiasticas ch'eran savens colliadas cun processions pompusas (e che stattan en il center da questa preschentaziun).** Il protestantissem, ch'ha dumandà da recurrer pli ferm a la Sontga Scrittira, ha demussà da l'entschatta ennà ina tenuta sceptica envers la pietad populara. En ina dimensiun pli pitschna èn però er sa svilupadas qua furmas d'expressiun figurativas e ritualas ed atgnadads regiunals.

## Firads

Dis da festa solitmain da derivanza ecclesiastica, per part cun ragischs precristianas. Durant l'entir temp medieval aveva l'uvestg il dretg da fixar ils firads per sia diocesa. A la fin dal 10avel tschientaner èn las canonisaziuns papalas daventadas usanza, permettend a las autoritads ecclesiasticas da controllar meglier ils cults. Conform a l'intensità locala u regiunala dal cult existivan differents grads e furmas da la veneraziun liturgica respectivamain populara che gievan da la simpla menziun dal sontg fin a processions e gieus religius. Als sontgs patrons vegnivan consecrads chapluttas, baselgias ed altars.

L'aboliziun dal cult dals sontgs en las plaivs reformadas ha midà radicalmain la vita da mintgadi che vegniva determinada dal chalender liturgic. Il grond dumber da festas da sontgs ha incità ils reformaders da celebrar mo anc festas fundadas sin il Nov Testament. Ils lieus catolics han mantegnì l'emprim la pratica dal temp medieval tardiv, els han dentant dà dapli paisa als cults existents, oravant tut a quels marians. Ina cesura en il chalender da festas catolicas ha fatg papa Pius V il 1570 cun limitar las festas da sontgs.

En la Veglia Republica procuravan mandats ecclesiastics, catolics e reformads, sco era tschentaments da firads per ina sanctificaziun severa da la dumengia e dals firads. Quests mandats cuntenevan generalmain admoniziuns davart il cumportament public e privat (mandats morals), obligaziuns religiusas, scumonds u prescripziuns economicas, els variavan dentant per quai che riguarda la severità da lur applicaziun e la puniziun en cas da surpassaments. La sanctificaziun da las dumengias e dals firads na vegniva dentant betg adina observada, oravant tut betg dals berniers e dals viturins. Sin appel da las dietas èn alura intervegnidas las vischnancas a moda severa. Ils plevons concedivan per regla dispensaziuns dal repaus da dumengia, per part en accordanza cun las autoritads secularas. Ils statuts da l'Engiadin'Ota (anc catolica) dal 1544 fixavan trenta firads ch'eran da respectar sco dumengias (firads cumandads); ils surpassaments ils pli pitschens vegnivan chastiads cun multas da 20 curunas. Suenter la reformaziun èn restads anc set firads sco era las pregias da la mesemna u da la gievgia, a las qualas avevan da far part almain ina persuna per fiev. Il di da la pregia eri scumandà da lavurar e dad ir sin via u a l'ustaria avant e durant la pregia. En la part reformada dal Grischun rumantsch è la noziun da firads sa limitada successivamain als firads suenter il di da s. Steffan, Bavania, glindesdi da Pasca e Tschuncaisma.

La vischnanca catolicas da Vaz ha mantegnì ina trentina da firads fin viaden il 20avel tschientaner, autras vischnancas catolicas avevan determinà in dumber sumegliant u perfin in dumber pli aut da firads cumandads (per exempel Anzainzas), da mez firads (firads levs, per exem-



Benedicziun a chaschun da la procession da Sontgilcrest (Surcuolm, ca. 1920).

pel ils apostels) e da firads facultativs (dis da devoziun). Tujetsch aveva anc intgins uschenumnads firads perbon, vul dir dis da devoziun per uraziuns spezialas cunter catastofas e per supplitgar la buntadivladad divina. Ils firads avevan effects negativs sin il traffic e sin la lavur en las vischnancas e regiuns pariteticas. A Domat per exempel vegniva il traffic da transit bloccà cun ina chadaina dapi il 1654. Vischnancas catolicas stuevan vegnir sviadas durant ils firads, cas cuntrarri eran ins sfurzà da spetgar fin il proxim lavurdi. Ultra da quai cumplitgavan ils differents chalenders (per part en vigor fin il 1812) anc la situaziun.

Il 1837 aveva Alois de Latour critigà il grond donn economic chaschunà tras il dumber excessiv da firads en regiuns catolicas, provocond qua tras ina critica vehementa cunter el. Il 1841 ha alura il papa accordà sin dumonda dal Corpus catholic ina reduziun dals passa 50 firads en Surselva.

Ultra dals firads ecclesiastics ha la Dieta determinà anc il 1832 la terza dumengia da settember sco di da rogaziun federala e dapi il 1993 è il prim d'avust (Festa naziunala) in di liber.

Tenor la lescha federala da fabrica dal 1914 pudevan ils chantunals designar otg firads l'onn che valevan sco dumengias. Questa regulaziun è vegnida surpigliada suenter la Segunda Guerra mundiala en la lescha da lavur ed integrata en las regulaziuns chantunals davart ils dis da repaus. Il 1911 ha papa Pius X reducì riguramain il dumber da firads e suenter il 1960/70 han ulteriurs firads pers lur caracter generalmain valaivel, per exempel

il di da s. Giusep (19 da mars) u l'Immaculata concepziun (8 da december). Entant ch'ils firads han pers plaunsieu lur muntada e lur cuntegn religius, han oravant tut ils dis da Pasca, Tschuncaisma e Nadal survegnì dapli impurtanza sco facturs turistic e commercialis. Ils firads pussibiliteschan fins d'emna prolungadas u vegnan savens utilisads per prender in'emna da vacanzas. *Adolf Collenberg*

## Patrocini

Il term patrocini designescha en la baselgia catolica la protectura tras in patron (per exempel s. Peder u s. Antoni) u ina patruna (per exempel s. Maria u s. Gada), sut la quala vegn messa in'instituziun (baselgia, ospital e.a.). Sche baselgias èn consecradas ad in misteri da la cardientscha (per exempel a la s. Trinitad, a la s. Crusch, al Cor da Jesus, al s. Spiert), celebrescha la plaiv, enstagl dal patrocini, ina festa titulara. Cun il patron u la patruna ha ina plaiv ina relaziun tut speziala, oravant tut sch'in martir u in missiunari cristian tempriv è vegnì sepulì en la baselgia respectiva (per exempel s. Plazi/claustra da Mustér, s. Flurin/Ramosch). Per autras baselgias han las plaivs tschernì in patron ed han deponì sche pussaivel reliquias (restanzas) dad el en la baselgia. Da quella pratica è naschì l'usit da metter l'edifizi da la baselgia e da la plaiv sut la protecciun dad in u da plirs sontgs e da celebrar la festa annuala dal sontg u da la sontga a moda particulara – la famosa «perdunanza» (dal latin \*perdonantia/perdonare, rumantsch perdunar) –, il pli savens cun ina procession.

Il patrocini d'ina baselgia po midar. En tscherts temps devi veritabels «sontgs da moda», tenor ils quals numerusas baselgias èn vegnidas numnadas, per exempel Bistgaun en il 16avel tschientaner e Maria en il 17avel tschientaner. Ils patrocini ils pli derasads en il Grischun èn Maria, Anna, Antoni, Gieri, Gion Battista, Luregn, Martin e Bistgaun. *Adolf Collenberg*

## Confraternitads

Associaziuns da cartents (latin confraternitates) reconuschidas da la baselgia per la tgira dad ovras pietusas voluntarias ed activitads socialas caritativas, attestadas en Svizra dapi il 13avel tschientaner. Las confraternitads laicas, naschidas en Svizra en il rom da la pietad dal pievel, èn sa svilupadas a moda diversa d'ina regiun a l'otra. Ellas suttastevan al dretg canonic (ecclesiastic). En il temp medieval tardiv existivan a Glion trais confraternitads, numnadamain la confraternitad da Nossadonna, quella da s. Giatgen e quella da la Sontga Crusch. A partir dal 14avel tschientaner ha existì a Cuir ina confraternitad da S. Nicolai. Il 1465 èn attestadas las confraternitads dals chalgers, dals cuntschaders e dals mazlers ch'èn probablmain las antecessuras da las mastergnanzas. Cun la reformaziun èn svanidas las confraternitads en las pravendas evangelicas.

En las regiuns catolicas han ellas puspè cuntanschì suenter ina crisa in'auta fluriziun en il temp baroc. Cuminaivel a tuttas confraternitads catolicas era l'obligaziun da manar ina vita exemplarica. Il papa Clemens VIII aveva ordinà ellas, te-

nor il dretg canonic, tras la bulla «Quaecumque» (1604) ed impegnà a lur finamira religiosa. Las confraternitads e cumpagnias da caracter religius e scolaistic, oravant tut quellas en las pravendas dal Grischun pastoradas da chaputschins en il 17avel e 18avel tschientaner, èn alura daventadas ina part essenziala da la pietad populara catolica.

Dal 17avel fin il 20avel tschientaner han existì a Cumbel 14 confraternitads respectivamain uniuns da caracter religius. Suagnign era in ulteriur center da confraternitads. Ellas sa numnavan per regla tenor in misteri da cardientscha, in sontg u in pensum determinà. L'emprima confraternitad da la ductrina cristiana è attestada il 1629 a Vaz. Quellas da las pravendas pastoradas da chaputschins han suandà l'exempel da Vaz (Sumvitg 1690, Cumbel 1693, Sagogn 1725 e.a.). La confraternitad da S. Rusari è documentada a Vella en il 17avel tschientaner (ella ha procurà per il maletg gigantic da Lepanto) ed a Suagnign dal 1706–1962. Cumbel ha obtegnì il 1659 ina confraternitad dal Sontgissim Num ed il 1660 la confraternitad da Nossadonna Immaculata. A Suagnign ha existì a partir dal 1655 la confraternitad dal Sontgissim Sacrament cun commembers da l'entir Grischun Central, dal Plau e da la Surselva. La cumpagnia da S. Francestg respectivamain il Terz Urden da S. Francestg (Terziars), resortì da quella confraternitad, è stada fitg derasada tranter il 17avel e la mesadad dal 20avel tschientaner. A Suagnign è stada activa dal 1715 al 1917 la confraternitad dalla tschinta da Nossadonna da la consolaziun cun commembers da l'entir Grischun catholic e perfin da la Vuclina. Al medem lieu è vegnida fundada il 1723 la confraternitad per ina buna mort.

L'illuminessem e las societads ed associaziuns naschidas en la segunda mesadad dal 19avel tschientaner han tschesentà fermamain las confraternitads. En connex cun la restauraziun interna da la baselgia en il 19avel tschientaner han quellas survegnì anc ina giada in'impurtanza pli gronda sco instruments da la pastoraziun (promozion da la vita religiusa tras uraziuns persunalas, devoziuns e processions). Conform a las furmas da pietad dal temp èn vegnidas fundadas ulteriuras confraternitads, per exempel quella dal Sontgissim Cor da Jesus (1874). Las tentativas da renovar las confraternitads, interprendidas a la sava dal 20avel tschientaner, han gì mo in pitschen success. *Adolf Collenberg*

## Parada

La parada dals giuvs, il pli savens en uniforma militar e cun arma, manava – e maina per part anc adina – las processions a l'ocasiun da festas ecclesiasticas catolicas, suandada da las bandieras da las uniuns dal vitg. La furma la pli festiva e tradiziunala da quel usit vegn anc tgrada a Domat. En il Puschlav ed il Surses è la parada vegnida remplazzada sut presiun dals chaputschins tras confraternitads. A quellas appartegna probablmain era la Procession dals confrats, in usit lià a la baselgia e cultivà il Di da las olmas (2 da november) en il Surses. Las confraternitads religiusas vegnivan cultivadas anc fin a l'entschatta dals onns 1960, oz sa preschentan ellas dentant mo anc a Sur. *Adolf Collenberg*



En il Grischun Central ha surtut Savognin enconuschì ina lunga tradiziun da confraternitads.

## Lexicon Istoric Retic

Il LIR cumpiglia bundant 3100 artgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.